



PRIMEIRO
MINISTRO

REPÚBLICA DEMOCRÁTICA DE TIMOR-LESTE

libertar um país e um povo para uma vida melhor



APRESIASAUN FOUN BA OJE 2019 PASA HO VOTU 40



PM Taur Matan Ruak Husu Emprezáriu Konfia Nafatin Governu

Dili, 31 Janeiru 2019: Orsamentu Jeral Estadu 2019 ne'ebé hetan veto hosi Prezidente Repúblika, Francisco Guterres Lu-Olo iha loron 23 fulan Janeiru 2019, kinta-feira ohin, halo ona apresiasaun foun iha Parlamentu Nasionál, no iha votasaun final global hetan votu a favor 40, kontra 25 no abstensaun o.

Iha apresiasaun foun refere, Parlamentu Nasionál altera tiha hodi hasai verba \$650 millaun, ne'ebé prevee antes atu sosa partisipasaun asaun ConocoPhillips no Shell nian, hodi responde ba mensajen veto Xefe Estadu nian ne'ebé transmite ba Parlamentu Nasionál sobre montante refere, ho alterasaun ne'e, mak Orsamentu Jeral Estadu ne'ebé antes ne'e \$2.1 billaun ne'ebé hetan veto, hatun ba \$1.4 billaun ital.

Ho alterasaun refere, konsidera hanesan projetu foun, no Prezidente Repúblika iha tempu loron 30 sura hosi simu diploma, atu estuda hodi promulga ou veta.

Hafoin remata debate plenária, S.Exa. Primeiru-Ministru, Taur Matan Ruak husu ba emprezáriu sira atu lalika pániku no kontinua tau fiar ba Governu ida ne'e, tanba sei iha solusaun ba OJE 2019 ne'eb'e PN halo ona apresiasaun foun, relasiona ho empreza balun ne'ebé ameadu atu taka tanba impase polítiku ne'ebé naruk demais ne'ebé afeita mos ba atividade empresarial.

“Hateten ba sira(emprezáriu-red) konfia Timor no timoroan sira, Timor lutador nunca lakon iha batalla, hakarak manán, tanba ne'e ha'u espera sira iha fatin, sira iha oportunidade para dezenvolve sira-nia negósiu, naturalmente Governu solidariza sira-nia esforsu no sakrifisiu, mas husu para sira korajen, la iha buat ida manán sem luta”, dehan Xefe Governu.

Xefe Governu realsa, OJE 2019 aprova filafali ona, tanba ne'e husu ba emprezáriu sira atu esperansa nafatin hodi hein, Xefe Estadu halo promulgasaun. **HOTU**